Okusisiseko Okutshiwo nguMgaqo-siseko

weRiphablikhi yoMzantsi-Afrika, 1996, Wenziwe lula usenzelwa abafundi



INTSHAYELELO, OKUSISISEKO OKUTSHIWOYO NOMQULU WAMALUNGELO

"Ulwimi lwesiNgesi owaqala ukubhalwa ngalo lo Mgaqo-siseko, lulo oluvunyiweyo"

Okusisiseko Okutshiwo nguMgaqo-siseko

weRiphablikhi yoMzantsi-Afrika, 1996, Wenziwe lula usenzelwa abafundi

Intshayelelo, Okusisiseko Okutshiwoyo noMqulu wamaLungelo

INTSHAYELELO YINTONI UMGAQO-SISEKO?

UMgaqo-siseko yimigaqo esisiseko emalilawulwe ngayo ilizwe. Uxela indlela alungelelaniswe ngayo onke amacandelo karhulumente kwaye uqulethe imigaqo mayela nokuba gunya lini elisetyenziswayo, lisetyenziswa ngubani, lisetyenziswa phezu kukabani ekulawulweni kwelizwe. UMgaqo-siseko ungathathwa ngokuthi uluhlobo oluthile lwesivumelwano esiphakathi kwabo baselulawulweni nabo balawulwayo. Uxela amalungelo nemisebenzi yabemi, namacebo okubabek' elisweni abo baselulawulweni.

UMgaqo-siseko weRiphablikhi yoMzantsi-Afrika ungumthetho owongamileyo welizwe lethu. Usisiseko esingumthetho sobukho beRiphablikhi, uxela amalungelo nemisebenzi yabemi, uze uxele ubume bukaRhulumente. Uye wabizwa ngokuba "usisiqinisekiso sokuzalwa" soMzantsi-Afrika okhululekileyo wentando yesininzi.

UMgaqo-siseko wethu ungowona mthetho ubalulekileyo — okanye owongamileyo — welizwe; akukho wumbi ovumelekileyo ukuba uphikisane nawo; engavumelekanga norhulumente ukuba enze into engqubana nawo. Kwilizwe lentando yesininzi yoMgaqo-siseko njengelethu, uMgaqo-siseko wongamile ngaphezu kwePalamente kwaye ungumthetho evavanywa ngayo yonke eminye imithetho ukuba ibhadlile na. Usebenza kuwo onke amacandelo karhulumente. INkundla yoMgaqo-siseko yeyona nkundla iphakamileyo yoMzantsi-Afrika kwiimbambano ezimayela noMgaqo-siseko kwaye iliqumrhu elizwi lalo lingenakuphikiswa ekuchazweni kwentsingiselo yoMgaqo-siseko.

Umzekelo, uMgaqo-siseko woMzantsi-Afrika uchaza indlela abunjwa ngayo urhulumente, indlela anyulwa ngayo, nendlela asebenza ngayo. Uchaza amagunya karhulumente – kwakunye nemida yala magunya – uze ugxininise amalungelo abantu. Ukwachaza indlela urhulumente aza kuphendula ngayo kubantu abamnyulileyo.

baseluntwini, UMgago-siseko usisiseko sobomi kodwa wenza okungaphezu kokuchaza ezibalulekileyo izinto zokusebenza kukarhulumente. UMgago-siseko wethu ubonisa amathemba nemingweno yesizwe.

UKUBALULEKA KWENTSHAYELELO, ISAHLUKO 1 (OKUSISISEKO OKUTSHIWOYO) NESAHLUKO 2 (UMQULU WAMALUNGELO) SOMGAQO-SISEKO

ImiGaqo-siseko yamazwe amaninzi isukela kwiimeko ezithile. UMzantsi-Afrika uye wathubeleza kutshintsho olukhulu ukusuka kulawulo lwengcinezelo localulo (nkqubo eyayikho ngenxa yokongama kwePalamente) ukuya kwintando yesininzi yoMgaqosiseko ezinkqamangele ekwakhiweni koluntu oluphila ngemigaqo yentando yesininzi, ubulungisa namalungelo oluntu asisiseko.

UMgaqo-siseko wethu ubonisa imbali yethu eyahlukileyo kwezinye iimbali nokunxanelwa kwethu inkululeko nentando yesininzi. Ngenxa yembali esisuka kuyo yoMzantsi-Afrika, akumangalisi ukuba mawube

uMgaqo-siseko wethu usoloko ugxininisa imfuneko yokwakha uluntu "olukhululekileyo lwentando yesininzi" olunesidima, ubulungisa nokulingana.

INtshayelelo yinkcazelo emfutshane esekuqaleni exela injongo esisikhokelo nemigaqo yoMgaqo-siseko. ISahluko 1 siqulethe imigaqo engundoqo yoMgaqo-siseko kwaye, ngenxa yokuba ibaluleke kunene, kunzima ukuyitshintsha.

ISiqendu 1 sinokwenziwa utshintsho kuphela nguMthetho Oyilwayo ophunyezwe yiNdlu yoWiso-Mthetho oxhaswa ziivoti ezingekho ngaphantsi kwama-75 ekhulwini zamalungu ayo naziivoti zamaphondo angekho ngaphantsi kwesithandathu kwiBhunga laMaphondo leZwelonke.

ImiGaqo-siseko nokulandelwa kwenkqubo yoMgaqo-siseko ziyahambisana namalungelo oluntu. Amalungelo adla ngokuba kwinxalenye eyodwa yoMgaqo-siseko ebizwa ngokuba nguMqulu wamaLungelo. UMqulu wamaLungelo woMzantsi-Afrika ukwiSahluko 2 soMgaqo-siseko ka-1996. Yile nxalenye yoMgaqo-siseko ethe yatsala umdla omkhulu – kwaye yaba nento eyenzayo kanobom kubantu baseMzantsi-Afrika – kwiminyaka embalwa edlulileyo. Le nxalenye ithetha ngamalungelo okulingana, elokuba nesidima sokuba ngumntu, elobomi nelokuba neemfihlo zakho, nelokunqula ngokukhululeka, nelokuthetha, ukubalula nje ambalwa. Ikwafikelela nakwimibandela yasemsebenzini, yabantwana, yemfundo neyenkqubo yomthetho.

UMqulu wamaLungelo uyingxonde yentando yesininzi eMzantsi-Afrika. Womeleza imigaqo yentando yesininzi yesidima sokuba ngumntu, ukulingana nenkululeko. UMqulu wamaLungelo okwiSahluko 2 soMgaqo-siseko unamalungelo oluntu abalulekileyo anjongo yawo ikukuchaza amalungelo abanawo abantu nendlela asebenza ngayo uze uxele ukuba aba nomda xa kutheni.

ISahluko 2 sinokwenziwa utshintsho kuphela nguMthetho Oyilwayo ophunyezwe yiNdlu yoWiso-Mthetho ngeevoti ezisisibini kwisithathu ubuncinane zamalungu ayo, naziivoti zamaphondo amathandathu ubuncinane kwiBhunga laMaphondo leZwelonke.

OKUQULETHWEYO

OKUQULETHWEYO

INTSHAYELELO	1	
ISAHLUKO 1 Okusisiseko	2	
ISAHLUKO 2 UMqulu wamaLungelo	5	
AMAZIKO EKUNOKUYIWA KUWO MAYELA		

"Ulwimi lwesiNgesi owaqala ukubhalwa ngalo lo Mgaqo-siseko, lulo oluvunyiweyo"

INTSHAYELELO

Thina, bantu baseMzantsi-Afrika,

Siyaziqonda iintswela-bulungisa zexesha elidlulileyo;

Sibothulel' umnqwazi abo baye bev' ubunzima ukuze kubekho ubulungisa nenkululeko elizweni lethu;

Siyabahlonela abo baye basebenzela ukwakha nokuphucula ilizwe lethu; kwaye

Sikholelwa kwelokuba uMzantsi-Afrika ngowabo bonke abahlala kuwo, bemanyene nangona bengafani.

Ngoko ke, ngabameli bethu abanyulwe ngokukhululekileyo, samkela lo Mgaqo-siseko njengomthetho owongamileyo weRiphablikhi ukuze -

Kungcibeke imisantsa yexesha elidlulileyo, kwakheke noluntu lwentando yesininzi, ubulungisa basentlalweni namalungelo oluntu asisiseko;

Kwandlalwe iziseko zoluntu lwentando yesininzi nolukhululekileyo apho urhulumente engowentando yabantu kwaye ummi ngamnye ekhuselwe ngumthetho ngokulinganayo nabanye;

Kuphuculwe umgangatho wobomi wabo bonke abemi, kukhululwe nomntu ngamnye afikelele kwelona nqanaba anokufikelela kulo lobuchule bakhe; kananjalo

Kwakhiwe uMzantsi-Afrika omanyeneyo wentando yesininzi okwaziyo ukuthabatha indawo yawo onelungelo layo njengelizwe elizimeleyo kusapho phakathi kwamanye amazwe.

Ngamana uThixo angabakhusela abantu bakowethu. Nkosi sikelel' iAfrika. Morena boloka setjhaba sa heso. God seën Suid-Afrika. God bless South Africa. Mudzimu fhatutshedza Afurika. Hosi katekisa Afrika.

ISAHLUKO 1

OKUZIZISEKO

IRiphablikhi yoMzantsi-Afrika

- 1. IRiphablikhi yoMzantsi-Afrika ililizwe elinye, elizimeleyo, lentando yesininzi elisekelwe koku kulandelayo:
 - (a) isidima sokuba ngumntu, ukufikelela ekulinganeni kwabantu bonke nokukhuthazwa kwamalungelo oluntu neenkululeko omalube nazo;
 - (b) ukungacaluli ngokobuhlanga nangokobuni;
 - (c) ukongama koMgaqo-siseko nokulawula komthetho;
 - (d) ilungelo lokuvota kwabo bonke abantu abadala, umqulu wabavoti omnye wezwelonke, unyulo olubakho rhoqo nenkqubo yamaqela amaninzi opolitiko yorhulumente wesininzi, ukuqinisekisa uxanduva lokuphendula, ukusabela nokusebenzela elubala

Ukongama koMgaqo-siseko

2. Lo Mgaqo-siseko ungumthetho owongamileyo weRiphablikhi; umthetho okanye ukwenza okungavisisaniyo nawo kuphuthile kwaye iimbopheleleko ezifunwa nguwo mazifezekiswe.

Ubumi

- 3. (1) Wonke umntu waseMzantsi-Afrika ungummi.
 - (2) Bonke abemi-
 - (a) banamalungelo ngokulinganayo okuxhamla kumalungelo, kwiinyhweba neenzuzo zokuba ngummi; kwaye
 - (b) banoxanduva ngokulinganayo lokufeza iimbopheleleko noxanduva lokuba ngummi.
 - (3) Imithetho yepalamente yezwelonke mayithethe ngokuzuzwa kobumi, ngokulahlekelwa bubo nangokubuyiselwa kwabo.

Umhobe Wesizwe

4. NguMongameli owenza isigqibo ngomhobe wesizwe weRiphablikhi ngokwenza isihlokomiso.

Iflegi yelizwe

5. Iflegi yelizwe yeRiphablikhi ingumbala omnyama, nagolide, naluhlaza, namhlophe, nabomvu, naluhlaza okwesibhakabhaka, njengoko ichazwe kwaye yazotywa kwiSihlomelo 1.

Iilwimi

- 6. (1) Iilwimi zaseburhulumenteni zeRiphablikhi siSepedi, neSesotho, neSetswana, neSiswati, nesiVenda, nesiTsonga, nesiBhulu, nesiNgesi, nesiNdebele, nesiXhosa, nesiZulu.
 - (2) Ngokuqonda imeko yeelwimi zomthonyama zabantu bakowethu nembali yazo yokuncitshiswa kokusetyenziswa kwazo, urhulumente makathabathe amanyathelo asebenzisekayo naqinisekileyo okuphakamisa umgangatho wezi lwimi aze akhuthaze ukusetyenziswa kwazo.
 - (3) (a) Urhulumente wezwelonke noorhulumente bamaphondo banokusebenzisa naziphi na iilwimi zaseburhulumenteni, bezisebenzisela imisebenzi yoburhulumente, becingela ukusetyenziswa kwazo, ukusebenziseka kwazo, indleko yokuzisebenzisa, iimeko zengingqi neemfuno zoluntu noko kukhethwa luluntu lulonke okanye kwiphondo elo; kodwa yena urhulumente wezwelonke kunye norhulumente ngamnye wephondo makasebenzise ubuncinane iilwimi ezimbini zaseburhulumenteni.
 - (b) Oomasipala mabacingele ukusetyenziswa kweelwimi ngabahlali kunye noko kukhethwa ngabo.
 - (4) Urhulumente wezwelonke noorhulumente bamaphondo mabathi, ngokuwis' imithetho nangezinye iindlela, bakulawule kwaye bakubek' esweni ukusetyenziswa kweelwimi zabo zaseburhulumenteni. Kungekuko ukuba

ISAHLUKO 1: OKUZIZISEKO

- kuyaphambukwa koko kutshiwo kwisiqendwana (2), zonke iilwimi zaseburhulumenteni mazixatyiswe ngokulinganayo kwaye maziphathwe ngokungakhwinisiyo.
- (5) IBhodi Yeelwimi YaseMzantsi-Afrika esekwe ngumthetho wepalamente wezwelonke–
 - (a) mayikhuthaze, kwaye idale iimeko, zokuphuhliswa nokusetyenziswa–
 - (i) kwazo zonke iilwimi zaseburhulumenteni;
 - (ii) kolwimi lwamaKhoi, nolwamaNama nolwamaSan; kunye
 - (iii) nolwimi lwezandla; kananjalo
 - (b) ikhuthaze ize iqinisekise ukuhlonelwa-
 - (i) kwazo zonke iilwimi ezisetyenziswa ngokuqhelekileyo ngabantu eMzantsi-Afrika, kuquka nesiJamani, nesiGrike, nesiGujarati, nesiHindi, nesiPhuthukezi, nesiTamil, nesiTelegu nesiUrdu; kunye
 - (ii) nesiArabhu, nesiHebhere, nesiSanskrit kunye nezinye iilwimi ezisetyenziselwa ukunqula eMzantsi-Afrika.

ISAHLUKO 2

UMQULU WAMALUNGELO

Amalungelo

- (1) Lo Mqulu wamaLungelo ulilitye lembombo lentando yesininzi eMzantsi-Afrika. Uqulethe amalungelo abo bonke abantu elizweni lethu kwaye uqinisekisa isidima sokuba ngumntu, ukulingana nenkululeko yentando yesininzi.
 - (2) Urhulumente makawahlonele, awakhusele, awakhuthaze kwaye awafezekise amalungelo akuMqulu wamaLungelo.
 - (3) Amalungelo akuMqulu wamaLungelo anokuthi asikelwe umda lusikelo-mda olukwisiqendu 36, okanye olukwenye indawo kuMqulu.

Ukusebenza kwawo

- 8. (1) UMqulu wamaLungelo usebenza kuwo wonke umthetho, kwaye unkqamangela abawisi-mthetho, urhulumente, iinkundla nawo onke amacandelo karhulumente.
 - (2) Okutshiwo kuMqulu wamaLungelo kunkqamangela umntu okanye inkampani, ukuba kuyasebenza kuyo, kuxhomekeke nasekubeni kusebenza kangakanani, kucingelwa ubunjani belungelo nobunjani boxanduva oluza nelungelo elo.
 - (3) Xa isebenzisa okutshiwo nguMqulu wamaLungelo kumntu okanye kwinkampani ngokwesiqendwana (2), inkundla–
 - (a) ukuze iphumeze ilungelo elikuMqulu, mayisebenzise, okanye ukuba kuyimfuneko, iphuhlise umthetho wohlobo olungabhalwanga phantsi, xa umthetho wepalamente wona ungalifezekisi elo lungelo; kwaye
 - (b) isenokuphuhlisa imigaqo yomthetho wohlobo olungabhalwanga phantsi ukulisikel' umda ilungelo, kodwa kuxhomekeke ekubeni oko kusikelwa umda kuyavumelana kusini na nesiqendu 36(1).

(4) Inkampani inelungelo lokuxhamla kumalungelo akuMqulu wamaLungelo kangangoko kufunwa bubunjani bamalungelo nabubunjani baloo nkampani.

Ukulingana

- 9. (1) Bonke abantu bayalingana phambi komthetho kwaye banelungelo lokukhuselwa ngokulinganayo ngumthetho nokuzuza ngokulinganayo kuwo.
 - (2) Ukulingana kuquka ukuxhanyulwa okupheleleyo nokulinganayo kwawo onke amalungelo neenkululeko. Ngenjongo yokukhuthaza ukuba kulinganwe, kusenokuthatyathwa amanyathelo okuwis' umthetho namanye amanyathelo acetyelwe ukukhusela okanye ukuphucula abantu, okanye iindidi zabantu, ezihlelelekileyo ngenxa yokucalulwa okungafanelekanga.
 - (3) Urhulumente akavumelekanga ukuba athi, ngokungqalileyo okanye ngokungangqalanga, acalule nabani na ngenye yezi ndlela zilandelayo: ngokobuhlanga, ngokobuni, ngokukhulelwa, ngobume bomntu ngokwasemtshatweni, ngobuzwe okanye ngemvelaphi yakhe ngokwasentlalweni, ngebala, ngotyekelo lwakhe ngokwesondo, ngobudala beminyaka, ngokugogeka, ngonqulo, ngesazela, ngenkolelo, ngenkcubeko, ngolwimi nangokuzalwa.
 - (4) Akukho mntu uvumelekileyo ukuba acalule ngokungafanelekanga, ngokungqalileyo okanye ngokungangqalanga, ecalula omnye ngenye yezi ndlela zixelwekwisiqendwana(3). Makuwisweumthethoyipalamente yezwelonke ukuthintela ucalulo olungafanelekanga.
 - (5) Ukucalula ngenye yezi ndlela zidweliswe kwisiqendwana (3) okanye ngeendlela eziliqela kwezo kukucalula okungafanelekanga ngaphandle kokuba kuveliswa izibakala ezibonisa ukuba olo calulo lufanelekile.

Isidima sokuba ngumntu

10. Wonk' ubani unesidima esingenakohluthwa nelungelo lokuba sihlonitshwe isidima sakhe kwaye sikhuselwe.

Ubomi

11. Wonk' ubani unelungelo lokuphila.

Inkululeko nokukhuseleka komntu

- 12. (1) Wonk' ubani unelungelo lenkululeko nokukhuseleka, elibandakanya ilungelo-
 - (a) lokuba angayohluthwa inkululeko ngokuzenzela nje, okanye kungekho sizathu sivakalayo;
 - (b) lokuba angavalelwa uhalala kungathethwa tyala;
 - (c) lokuba angagonyamelwa nangaluphi na uhlobo, nokuba kukugonyamelwa ngamagosa aseburhulumenteni okanye ngabantu nje;
 - (d) lokuba angangcungcuthekiswa nangayiphi na indlela; nelokuba
 - (e) angaphathwa okanye ohlwaywe ngendlela ekhohlakeleyo, engenabuntu okanye ethob' isidima'.
 - (2) Wonk' ubani unelungelo lokuba angenziwa nto emzimbeni nasenggondweni, eliquka ilungelo-
 - (a) lokuzenzel' isigqibo mayela nokuzala;
 - (b) lokukhuseleka komzimba wakhe nokuba ulawulwe nguye; nelokuba
 - (c) kungenziwa ufuniselo lonyango okanye lobunzululwazi kuye ngaphandle kwemvume yakhe.

Ubukhoboka nomsebenzi wesinyanzelo

13. Akukho bani unokwenziwa ikhoboka okanye enziswe umsebenzi wesinyanzelo.

Ukuba neemfihlo

- 14. Wonk' ubani unelungelo lokuba neemfihlo, eliquka ilungelo lokuba–
 - (a) angasetshwa emzimbeni okanye kungasetshwa umzi wakhe;
 - (b) ingasetshwa impahla yakhe;
 - (c) zingathathwa izinto zakhe; okanye
 - (d) zingaphulaphulwa iincoko zakhe nabanye abantu.

Inkululeko yokunqula, yenkolelo noluvo

- 15. (1) Wonk' ubani unelungelo lokwenza ngokwesazela sakhe, unenkululeko yokunqula, yokucinga, yokukholelwa, nokuba noluvo lwakhe.
 - (2) Unqulo lunokuqhutywa kumaziko karhulumente okanye kumaziko ancediswa ngurhulumente, kodwa kuxhomekeka ekubeni–
 - (a) oko kunqula kulandela imigaqo eyenziwe ngabasemagunyeni abafanelekileyo;
 - (b) kunqulwa ngendlela engakhalazisiyo; kwaye
 - (c) ukubakho apho kusimahla kwaye kungokuzithandela.
 - (3) (a) Esi siqendu asiyithinteli imithetho yepalamente-
 - (i) eyamkelayo imitshato ekungenwe kuyo ngokwesithethe, okanye ngokwenkqubo yonqulo, okanye ngokwenkqubo yosapho; okanye
 - (ii) eyamkela iinkqubo ekuqhutywa ngazo kusapho oluthile ngokwesithethe, okanye ngokwabantu bonqulo oluthile.
 - (b) Ukwamkelwa yimithetho yepalamente ngokwesiqendu (a) makuvisisane nokutshiwo kwesi siqendu nokunye okutshiwo nguMgaqo-siseko.

Inkululeko yokuthetha

- 16. (1) Wonk' ubani unelungelo lenkululeko yokuthetha, eliquka-
 - (a) inkululeko yamaphephandaba namanye amajelo eendaba:

ISAHLUKO 2: UMQULU WAMALUNGELO

- (b) inkululeko yokufumana ingcombolo okanye ukunika abanye ingcombolo okanye iingcamango;
- (c) inkululeko yokusebenzisa ubuchule bokuziqalela izinto;
- (d) nenkululeko yemfundo nenkululeko yophando kubunzululwazi.
- (2) Ilungelo elikwisigendwana (1) aliquki-
 - (a) ukuphemb' imfazwe;
 - (b) ukuthundeza abanye ukwenz' ugonyamelo olukhawulezileyo; okanye
 - (c) ukukhuthaza intiyo esekelwe kubuhlanga, kubuzwe, kubuni okanye kunqulo, nekhuthaza ukwenzakalisa.

Ukuhlanganisana, ukuqhankqalaza, noxwebhu lwezikhalazo

17. Wonk' ubani unelungelo lokuhlanganisana nabanye, lokuqhankqalaza nelokudlulisa uxwebhu lwezikhalazo, ekwenza oko ngoxolo kwaye engaxhobanga.

Inkululeko yokuzibandakanya

18. Wonk' ubani unelungelo lokuzibandakanya ngokukhululekileyo.

Amalungelo opolitiko

- 19. (1) Wonke ummi ukhululekile ukwenza ukhetho kupolitiko, okuguka ilungelo–
 - (a) lokusungula umbutho wopolitiko;
 - (b) lokuthabath' inxaxheba kwimisebenzi yombutho wopolitiko, okanye ukuwugayel' amalungu umbutho wopolitiko;
 - (c) nokuphum' iphulo lombutho wopolitiko okanye iphulo lenjongo yopolitiko.
 - (2) Wonke ummi unelungelo lonyulo olukhululekileyo, olungenamkhethe nolubakho rhoqo lalo naliphi na iqumrhu lowiso-mthetho elisekwe ngokoMgaqo-siseko.
 - (3) Wonk' ummi ongumntu omdala unelungelo-

- (a) lokuvota kunyulo evotela naliphi na iqumrhu lowisomthetho elisekwe ngokoMgaqo-siseko, ekwenza oko emfihlakalweni;
- (b) nelokuzigqatsela isikhundla saseburhulumenteni aze, ukuba unyuliwe, angene kuso.

Ubumi

20. Akukho mmi onokohluthwa ubumi.

Inkululeko yokuhamba-hamba nokuhlala

- 21. (1) Wonk' ubani unelungelo lenkululeko yokuhamba-hamba.
 - (2) Wonk' ubani unelungelo lokumka kwiRiphablikhi.
 - (3) Wonk' ubani unelungelo lokungena kwiRiphablikhi, lokuqhubeka engaphakathi kuyo, nelokuhlala naphi na kuyo.
 - (4) Wonk' ummi unelungelo lokuba nephaspothi.

Inkululeko yokurhweba, yokusebenza nokwenza umsebenzi ofundelweyo

22. Wonk' ummi unelungelo lokukhetha ngokukhululeka urhwebo alufunayo, umsebenzi okanye umsebenzi awufundeleyo. Ukurhweba, ukusebenza okanye ukwenza umsebenzi ofundelweyo kusenokuthi kulawulwe ngumthetho.

Ubudlelane emisebenzini

- 23. (1) Wonk' ubani unelungelo lokuphathwa ngendlela engenamkhethe emsebenzini.
 - (2) Wonk' umsébenzi unelungelo-
 - (a) lokusungula umbutho wabasebenzi nokuzimanya nawo:
 - (b) lokuthabath' inxaxheba kwimisebenzi yombutho wabasebenzi nakwizicwangciso zawo;
 - (c) nelokugwayimba.
 - (3) Wonk' umgeshi unelungelo-
 - (a) lokusungula umbutho wabaqeshi nokuzimanya nawo;

ISAHLUKO 2: UMQULU WAMALUNGELO

- (b) nelokuthabath' inxaxheba kwimisebenzi yombutho wabaqeshi nakwizicwangciso zawo.
- (4) Umbutho ngamnye wabasebenzi nombutho ngamnye wabaqeshi unelungelo-
 - (a) lokwenz' izigqibo ngolawulo lwawo nezicwangciso zawo nemisebenzi yawo;
 - (b) lokuququzelela;
 - (c) nelokusungula umanyano uze uzibandakanye nalo.
- (5) Umbutho ngamnye wabasebenzi, umbutho ngamnye wabaqeshi nomqeshi banelungelo lokubandakanyeka kwiingxoxo zokubonisana. Kunokuwisw' umthetho wezwelonke ngenjongo yokulawula iingxoxo zokubonisana. Xa kunokuthi umthetho wepalamente ulisikel' umda ilungelo elikwesi Sahluko, oko kulisikel' umda makuvisisane nesiqendu 36(1).
- (6) Umthetho wepalamente wezwelonke usenokuthi uwamkele amalungiselelo okhuseleko ombutho wabasebenzi aqulethwe kwizivumelwano zendibaniselwano. Xa unokuthi umthetho owiswe yipalamente ulisikel' umda ilungelo elikwesi Sahluko, oko kulisikel' umda makuvisisane nesigendu 36(1).

Okusingqongileyo

- 24. Wonk' ubani unelungelo-
 - (a) lokuba okusingqongileyo kungabi yingozi kwimpilo yakhe okanye kwintlalo-ntle yakhe;
 - (b) nelokuba okusingqongileyo kukhuselwe, ukuze kuncedakale izizukulwana zangoku nezexesha elizayo, ngokuthi kuwisw' imithetho enokubonelela, kusetyenziswa nezinye iindlela–
 - (i) ezithintela ungcoliso nokuwohloka kwemeko yokusingqongileyo;
 - (ii) ezikhuthaza ulondolozo lwendalo;
 - (iii) nolwenza uphuhliso oluqhubekayo lwemeko

yokusingqongileyo nokusetyenziswa kobuncwane bendalo ngoxa zikhuthaza uphuhliso oluthethelelekayo kuqoqosho nakwintlalo.

Umhlaba okanye izakhiwo

- 25. (1) Akukho bani onokohluthwa umhlaba okanye isakhiwo ngaphandlekokubakungomthethoosebenzakuwonkewonke, kwaye akukho mthetho onokuvumela ukohluthwa komhlaba okanye isakhiwo kungaboniswananga.
 - (2) Umhlaba okanye isakhiwo unokuthathwa kuphela ngokomthetho osebenza kuwonkewonke-
 - (a) ngenjongo eyekarhulumente okanye ukuze kuncedakale uluntu;
 - (b) xa kuthe kwakho imbuyekezo, exabiso layo, nexesha emayihlawulwe ngalo, nendlela emayihlawulwe ngayo, ekufanele ukuba kuvunyelwane ngabo bachaphazelekayo, kungenjalo igqitywe yinkundla okanye ivunywe yiyo.
 - (3) Isixa sembuyekezo nexesha lokuhlawulwa kwayo nendlela yokuhlawulwa kwayo mazibe zezinobulungisa nezingakhalazisiyo, zibonakalisa ukulinga-lingana okungakhalazisiyo phakathi koncedo oluzuzwa luluntu nokuchaphazeleka kwabo bachaphazelekayo, kucingelwa zonke iimeko ezifanelwe kukucingelwa, eziquka–
 - (a) into osetyenziselwa yona ngoku umhlaba lowo okanye isakhiwo;
 - (b) imbali yokuzuzwa kwaloo mhlaba okanye isakhiwo neyokusetyenziswa kwawo okanye kwaso;
 - (c) ixabiso laloo mhlaba okanye isakhiwo emarikeni;
 - (d) ukuthi urhulumente wenza utyalo-mali kangakanani kuwo okanye kuso ngokuthe ngqo noncedomali ekuzuzweni kwaloo mhlaba okanye isakhiwo nokuphuculwa kwawo okanye kwaso okuluncedo;

- (e) nenjongo yokuthathwa kwawo okanye kwaso.
- (4) Ngenjongo yokusebenza kwesi siqendu, ukuncedakala koluntu kuquka ukuzibophelela kwesizwe ekuguqulweni kwenkqubo yomhlaba, nakwiinguqu zokubangela ukuba kufikeleleke ngokungakhalazisiyo kubo bonke ubuncwane bendalo boMzantsi-Afrika.
- (5) Urhulumente makathabathe amanyathelo afanelekileyo ngokuwis' imithetho nangezinye iindlela, ngokobuncwane anabo, ukubangela iimeko ezenza ukuba abemi bakwazi ukuba nomhlaba ngokungakhalazisiyo.
- (6) Umntu okanye abantu abalungelo labo lomhlaba okanye isakhiwo lingakhuselekanga ngokwasemthethweni ngenxa yemithetho okanye imikhwa yexesha elidlulileyo ecalula ngokobuhlangaunelungelookanyebanelungelo,kangangoko kuvunyelwa nguMthetho wePalamente, lokubambelela kwilungelo elikhuselekileyo ngokwasemthethweni okanye unelungelo okanye banelungelo lokuba abuyiselwe okanye babuyiselwe okulingana noko alahlekelwe okanye balahlekelwe kuko.
- (7) Umntu okanye abantu abohluthwe umhlaba okanye isakhiwo emva komhla we-19 kuJuni 1913 ngenxa yemithetho okanye imikhwa yexesha elidlulileyo ecalula ngokobuhlanga unelungelo okanye banelungelo kangangoko kuvunyelwa nguMthetho wePalamente ukuba abuyiselwe okanye babuyiselwe loo mhlaba okanye eso sakhiwo okanye afumane okanye bafumane imbuyekezo elingana noko alahlekelwe kuko okanye balahlekelwe kuko.
- (8) Akukho okutshiwo sesi siqendu okunokuthintela urhulumente ekuthabatheni amanyathelo okuwis' umthetho nawolunye uhlobo ukuze kubekho inguqu kwinkqubo yomhlaba namanzi nokunye okuhlobene noko, ngenjongo yokulungisa iziphumo zocalulo lobuhlanga lwexesha elidlulileyo, kodwa ke kuxhomekeke ekubeni nakuphi na okutenxileyo okutshiwo sesi siqendu kuyavisisana nokutshiwo sisiqendu 36(1).

(9) IPalamente mayiwise umthetho ekuthethwe ngawo kwisiqendwana (6).

Izindlu

- 26. (1) Wonk' ubani unelungelo lokuba nendlu eyaneleyo.
 - (2) Urhulumente makathabathe amanyathelo afanelekileyo ngokuwis' imithetho nangezinye iindlela, ngokobuncwane anabo, ukuze alenze lifezeke ngokuthe ngcembe eli lungelo.
 - (3) Akukho mntu onokukhutshwa ekhayeni lakhe, okanye adilizelwe ikhaya lakhe, ngaphandle komyalelo wenkundla okhutshwe emva kokuqwalasela zonke iimeko emaziqwalaselwe. Akukho mthetho wepalamente onokuvumela ukukhutshwa ezindlwini kungaboniswananga.

Unonophelo lwempilo, ukutya, amanzi nokhuseleko eluntwini

- 27. (1) Wonk' ubani unelungelo lokufumana-
 - (a) iinkonzo zokunonophelwa kwempilo, kuquka nononophelo lwempilo olumayela nokuzala;
 - (b) ukutya okwaneleyo namanzi; kwakunye
 - (c) nokhuseleko eluntwini, kuquka, ukuba akanandlela yokuzondla ngokwakhe nabo baxhomekeke kuye, noncedo olufanelekileyo oluvela eluntwini.
 - (2) Urhulumente makathabathe amanyathelo afanelekileyo okuwis' imithetho nawezinye iindlela, ngokobuncwane obufumanekayo, ukuze la malungelo afezeke ngokuthe ngcembe.
 - (3) Akukho bani onokwalelwa unyango kwimeko yequbuliso.

Abantwana

- 28. (1) Wonke umntwana unelungelo-
 - (a) lokuba negama nelizwe angummi walo ukususela ekuzalweni;
 - (b) lokunonophelwa lusapho okanye lokunonophelwa ngabazali, okanye lokunonophelwa ngenye indlela

- efanelekileyo xa esusiwe elusatsheni lwakowabo;
- (c) lokufumana ukutya okunesondlo esisisiseko, ikhusi, iinkonzo zokunonophelwa kwempilo ezisisiseko neenkonzo zoonontlalo-ntle;
- (d) lokukhuselwa kwimpatho-mbi, kwintswela-nkathalo, ekuxhatshazweni okanye ekuthotyweni;
- (e) lokukhuselwa ekuxhatshazweni kwiimeko zasempangelweni;
- (f) lokungayalelwa okanye lokungavunyelwa ukuba enze umsebenzi okanye enze iinkonzo–
 - (i) ezingamfanelanga umntu ongumntwana; okanye
 - (ii) ezibeka emngciphekweni impilo-ntle yomntwana, imfundo yakhe, impilo yakhe engokwasemzimbeni okanye engokwasengqondweni okanye engokomoya, nokukhula kwakhe;
- (g) lokuba angavalelwa, ngaphandle kokuba alikho elinye icebo elinokuzanywa, ekuya kuthi xa kunjalo ke, ukongezelela kumalungelo anawo umntwana ngokwesiqendu 12 nesama-35, umntwana abe nokuvalelwa elona xesha lifutshane lifanelekileyo, kwaye unelungelo—
 - (i) lokungadityaniswa nabanye abantu abavalelweyo ababudala bungaphezu kweminyaka eli-18;
 - (ii) nelokuphathwa ngendlela ebonisa, kwaye egcinwe kwiimeko ezibonisa, ulwazelelelo ngobudala bomntwana;
- (h) lokuba abe negqwetha alinikwa ngurhulumente, ngeendleko zikarhulumente, kumatyala embambano achaphazela umntwana, ukuba ukungabikho kwegqwetha bekuya kubangela intswela-bulungisa enkulu;
- (i) nelokungasetyenziswa ngokuthe ngqo kungquzulwano ekuxhotyiweyo kulo, nelokukhuselwa ngamaxesha ongquzulwano ekuxhotyiweyo kulo.

- (2) Ukulungelwa komntwana kokona kubalulekileyo kuwo nawuphi na umcimbi ongomntwana.
- (3) Kwesi siqendu igama elithi "umntwana" lithetha umntu obudala bungaphantsi kweminya eli-18.

Imfundo

- 29. (1) Wonk' ubani unelungelo-
 - (a) lokufumana imfundo esisiseko, kuquka nemfundo yabantu abadala esisiseko;
 - (b) nelokufumana imfundo ebhekele phaya, mfundo leyo urhulumente amele ukuba ayenze ifumaneke ngokuthe ngcembe ngokuthabath' amanyathelo afanelekileyo.
 - (2) Wonk' ubani unelungelo lokufumana imfundo ngolwimi lwaseburhulumenteni okanye ngeelwimi ezikhethwe nguye kumaziko emfundo karhulumente apho loo mfundo inokuthi ifumaneke khona. Ukuze urhulumente aqinisekise ukufezekiswa kweli lungelo nokwenziwa kwalo lisebenze, makacinge ngazo zonke iindllela ezifanelekileyo ezizezinye zemfundo, kuquka namaziko afundisa ngolwimi olunye, kucingelwa—
 - (a) ubulungisa;
 - (b) ukusebenziseka;
 - (c) nemfuneko yokulungisa iziphumo zemithetho nemikhwa yocalulo lobuhlanga yexesha elidlulileyo.
 - (3) Wonk' ubani unelungelo lokwakha amaziko emfundo azimeleyo aze awalondoloze ngeendleko zakhe, kube ngamaziko-
 - (a) angacaluliyo ngobuhlanga;
 - (b) abhalisiweyo kurhulumente;
 - (c) angehleliyo ngezantsi kumgangatho wamaziko emfundo karhulumente.
 - (4) Isiqendwana (3) asikuthinteli ukufunyanwa kwenkxaso-mali karhulumente ngamaziko emfundo azimeleyo.

Ulwimi nenkcubeko

30. Wonk' umntu unelungelo lokusebenzisa ulwimi oluthandwa nguye nokuthabath' inxaxheba kubomi benkcubeko obuthandwa nguye, kodwa akukho bani osebenzisa la malungelo uvumelekileyo ukuwasebenzisa ngendlela engavisisaniyo noko kutshiwo kuMqulu wamaLungelo.

Abantu abaphila ngokwenkcubeko yabo, ngokonqulo lwabo nangokolwimi lwabo

- 31. (1) Abantu abangabenkcubeko ethile, abangabonqulo oluthile, okanye abangabolwimi oluthile abanakulibandezwa ilungelo, bekunye nabanye abantu boluntu lwakowabo–
 - (a) lokuyonwabela inkcubeko yabo, lokunqula ngokonqulo lwabo, nelokusebenzisa ulwimi lwabo;
 - (b) nelokusungula imibutho yenkcubeko, yonqulo, neyolwimi, aze umntu azimanye nayo kwaye ayilondoloze, kunye neminye imibutho yoluntu.
 - (2) Amalungelo akwisiqendwana (1) akanakusetyenziswa ngendlela engavisisaniyo nokutshiwo kuMqulu wamaLungelo.

Ukufumana ingcombolo

- 32. (1) Wonk' ubani unelungelo lokufumana-
 - (a) nayiphi na ingcombolo ekurhulumente; kunye
 - (b) nayo nayiphi na ingcombolo ekomnye umntu, efunekayo ukuze umntu akwazi ukusebenzisa okanye ukukhusela amalungelo.
 - (2) Makuwiswe umthetho wepalamente wezwelonke ngenjongo yokufezekisa eli lungelo, kwaye loo mthetho unokutsho amanyathelo afanelekileyo amakathatyathwe okwenza lula umthwalo omayela nolawulo nezimali othwelwe ngurhulumente.

Ukwenziwa kwezigqibo ngobulungisa

- 33. (1) Wonk' ubani unelungelo lokuba ukwenziwa kwesigqibo ngomcimbi wakhe kube kokusemthethweni, okunokubonelela nokusingethwe ngobulungisa.
 - (2) Wonk' ubani omalungelo akhe aye anyhashwa sisigqibo esithathiweyo unelungelo lokunikwa izizathu ezibhaliweyo.
 - (3) Makuwiswe umthetho wepalamente wezwelonke ngenjongo yokufezekisa la malungelo, kwaye loo mthetho-
 - (a) mawuyalele ukuba isigqibo esithatyathiweyo siqwalaselwe ngokutsha yinkundla okanye, apho kufanelekileyo, ngabachopheli-matyala abazimeleyo, abangenamkhethe;
 - (b) mawunyanzele urhulumente ukuba afezekise amalungelo akwisiqendwana (1) nesesi-(2); kwaye
 - (c) mawukhuthazeukwenziwakwezigqibongokutyibilikayo.

Ukufikelela ezinkundleni

34. Wonk' ubani unelungelo lokuba nayiphi na imbambano anayo enokusonjululwa ngokusetyenziswa komthetho kwenziwe isigqibo ngayo ekuxoxweni kwetyala okungenamkhethe esidlangalaleni phambi kwenkundla okanye, apho kufanelekileyo, phambi kwabanye abachopheli-matyala abazimeleyo abangenamkethe.

Abantu ababanjiweyo, abavalelweyo nabamangalelweyo

- 35. (1) Wonk' ubani obanjiweyo etyholwa ngokwaphul' umthetho unelungelo-
 - (a) lokuthula;
 - (b) lokwaziswa ngokukhawuleza-
 - (i) ngelungelo lokuthula;
 - (ii) nangeziphumo zokungathuli;
 - (c) lokunganyanzelwa ukuba enze imvumo-tyala enokuthi isetyenziswe kubungqina nxamnye naye;
 - (d) lokuziswa phambi kwenkundla kamsinya kangangoko kunokwenzeka, kodwa kungekapheli-

- (i) iiyure ezingama-48 ebanjiwe; okanye
- (ii) imini yokuqala yenkundla emva kokuba kuphele iiyure ezingama-48, ukuba iiyure ezingama-48 ziphela kungezizo iiyure zokusebenza kwenkundla eziqhelekileyo okanye ngemini engeyiyo imini yokusebenza kwenkundla eghelekileyo;
- e) lokuba ekuveleni kwakhe kokuqala enkundleni emva kokuba ebanjiwe, abekw' ityala okanye aziswe ngesizathu sokuqhubeka kokuvalelwa, kungenjalo akhululwe;
- (f) nelokukhululwa ekuvalelweni ukuba ubulungisa buyavuma, ekhululwa ngemiqathango enokubonelela.
- (2) Wonk' ubani ovalelweyo, kuquka nebanjwa ngalinye eligwetyiweyo, unelungelo-
 - (a) lokwaziswa ngokukhawuleza ngesizathu sokuvalelwa;
 - (b) lokukhetha igqwetha aze afakan' umlomo nalo, kwaye aziswe ngeli lungelo msinya;
 - (c) lokuba anikwe igqwetha ngurhulumente ngeendleko zikarhulumente, ukuba ngokungabi nalo kungakho intswela-bulungisa enkulu, kwaye aziswe ngeli lungelo msinya;
 - (d) lokukucel' umngeni ukuba semthethweni kokuvalelwa kwakhe, ekwenza oko buqu phambi kwenkundla, kuze kuthi, ukuba ukuvalelwa oko akukho mthethweni, akhululwe;
 - (e) lokuba iimeko avalelwe kuzo zivisisane nokuba nesidima kwakhe, ziquke ubuncinane ukwenza umthambo nokunikwa indawo yokuhlala eyaneleyo, ukutya okunesondlo, into efundwayo nonyango, ngeendleko zikarhulumente:
 - (f) nelokuba athethe kwaye atyelelwe-
 - (i) liqabane lakhe lomtshato okanye sisingandamathe;
 - (ii) sisihlobo esisondeleyo;
 - (iii) ngumluleki okhethwe nguye kwicala lonqulo;

- (iv) nangugqirha okhethwe nguye.
- (3) Wonke umntu omangalelweyo unelungelo lokuxoxwa kwetyala okunobulungisa, okuquka ilungelo–
 - (a) lokwaziswa ngesimangalo esineenkcukacha ezaneleyo ukuze akwazi ukusiphendula;
 - (b) lokuba nexesha elaneleyo namancedo awaneleyo okulungiselela ukuzithethelela;
 - (c) lokuba ityala lakhe lixoxwe elubala phambi kwenkundla eqhelekileyo;
 - (d) lokuba ukuxoxwa kwetyala lakhe kuqalise kuze kufike esiphelweni ngaphandle kokulibaziseka okungavakaliyo;
 - (e) lokuba abekho xa kuxoxwa ityala lakhe;
 - (f) lokuba azikhethele igqwetha aze amelwe lilo, kwaye aziswe ngeli lungelo msinya;
 - (g) lokuba anikwe igqwetha ngurhulumente ngeendleko zikarhulumente, ukuba ngokungalinikwa kungakho intswela-bulungisa enkulu, kwaye aziswe ngeli lungelo msinya;
 - (h) lokuba athathwe njengomntu omsulwa, athule, anganiki bungqina ekuxoxweni kwetyala;
 - (i) lokuba anike ubungqina kwaye abuphikise ubungqina obunikiweyo;
 - (j) lokuba anganyanzelwa ukunika ubungqina obumdyobha ngetyala;
 - (k) lokuba lixoxwe ityala lakhe ngolwimi aluqondayo, kungenjalo ukuba akunakwenzeka oko, atolikelwe ngolo lwimi aluqondayo kwelo tyala;
 - (l) lokubaangafunyaniswaenetyalalokwenzaisenzookanye lokungenzi isenzo esasingekuko ukwaphul' umthetho ngokomthetho welizwe okanye ngokomthetho wamazwe ngamazwe ngexesha awasenza ngalo okanye ngexesha angazange asenze ngalo;
 - (m) lokuba angaxoxisw' ityala ngokwaphul' umthetho mayela nokwenza okanye ukungenzi isenzo awayesele

- efunyaniswe engenatyala okanye awayesele efunyaniswe enetyala ngaso;
- (n) lokuba afumane esona sincinane kwizohlwayo ezitshiwo ngumthetho ukuba isohlwayo esifunwa ngumthetho sokwaphul' umthetho siye satshintshwa kwixesha eliphakathi kokwaphula kwakhe umthetho nokugwetywa kwakhe;
- (o) nelokubhenela kwinkundla engentla okanye ityala lakhe liqwalaselwe ngokutsha yiyo.
- (4) Nanini na xa esi siqendu sifuna ukuba umntu anikwe ingcombolo, makayinikwe loo ngcombolo ngolwimi aluqondayo.
- (5) Ubungqina obufunyenwe ngendlela enyhasha ilungelo elikuMqulu wamaLungelo mabungamkelwa ukuba ukwamkelwa kwabo kuya kukwenza ukuxoxwa kwetyala kube kokungenabulungisa okanye kube nobungozi ekusingathweni kobulungisa.

Ukusikelwa umda kwamalungelo

- 36. (1) Amalungelo akuMqulu wamaLungelo anokusikelwa umda kuphela ngokomthetho osebenza kuwonkewonke, kodwa ukusikelwa umda oko kube kokunokubonelela nokuthethelelekayo kuluntu olukhululekileyo lwentando yesininzi oluhlonela isidima sokuba ngumntu, ukulingana nenkululeko, kuvelelwa zonke iinkalo emazivelelwe, eziquka—
 - (a) ubunjani belungelo;
 - (b) ukubaluleka kwenjongo yokusikelwa umda;
 - (c) ubunjani bokusikelwa umda nobungakanani bako;
 - (d) ikhonkco phakathi kokusikelwa umda nenjongo yako;
 - (e) nokusetyenziswa kweyona ndlela ingcathu yokuyifeza loo njongo.
 - (2) Ngaphandle kokuba kwenziwa ngendlela exelwe kwisiqendwana (1) okanye exelwe kwezinye iinxalenye

zoMgaqo-siseko, akukho mthetho onokuthi ulisikel' umda ilungelo elikuMgaqo-siseko.

Iimeko zequbuliso

- 37. (1) Kunokwenziwa isibhengezo sobukho bemeko yequbuliso kuphela ngokoMthetho wePalamente, kunjalonje kuphela xa–
 - (a) ubomi besizwe busongelwa yimfazwe, luhlaselo, luvukelo, sisiphithiphithi, yintlekele yendalo okanye yenye imeko yequbuliso echaphazela uluntu; kube
 - (b) ukwenziwa kwesibhengezo kuyimfuneko ukuze kubuye kubekho uxolo nocwangco.
 - (2) Ukubhengezwa kwemeko yequbuliso, kunye nawo nawuphi na umthetho wepalamente owisiweyo okanye elinye inyathelo elithatyathiweyo elisisiphumo sokwenziwa kweso sibhengezo, kunokuqalisa ukusebenza kuphela–
 - (a) kwixesha elisengaphambili;
 - ixesha elingengaphezulu kweentsuku ezingama-21 (b) ukususela kumhla wokwenziwa kwesibhengezo, ngaphandle kokuba iNdlu yoWiso-mthetho igqiba kwelokuba ilolule ixesha lesibhengezo. inokulolula ixesha lesibhengezo semeko yequbuliso elingengaphezulu kweenyanga ezintathu ngexesha. Ukolulwa kokugala kwemeko yegubuliso makube ngesiggibo esamkelwe ngevoti ekuxhasayo oko yesininzi samalungu eNdlu. Nakuphi na ukolulwa okulandelayo emva koko makube ngesiggibo esamkelwe ngevoti ekuxhasayo oko yamalungu eNdlu angama-60 ekhulwini ubuncinane. esingokwesi sigendu sinokwamkelwa kuphela emva kwengxoxo yasesidlangalaleni kwiNdlu.
 - (3) Nayiphi na inkundla enegunya lokukwenza oko inokuthathi isiggibo ngokufaneleka–

- (a) kwesibhengezo semeko yequbuliso;
- (b) ngokolulwa kwexesha lesibhengezo semeko yequbuliso; okanye
- (c) kwawo nawuphi na umthetho wepalamente owisiweyo, okanye elinye inyathelo elithatyathiweyo ngenxa yokubhengezwa kwemeko yequbuliso.
- (4) Nawuphi na umthetho wepalamente owiswe ngenxa yokubhengezwa kwemeko yequbuliso unokutenxa kuMqulu wamaLungelo kuphela ngokwenqanaba—
 - (a) elifunwa ngokunggonggo yimeko yequbuliso leyo;
 - (b) lokuba umthetho wepalamente-
 - uvisisane neembopheleleko iRiphablikhi enazo ngokomthetho wamazwe ngamazwe osebenza kwiimeko zequbuliso;
 - (ii) uvisisane nesiqendwana (5); kwaye
 - (iii) upapashwe kuShicilelo-Mithetho lukaRhulumente (Government Gazette) lwezwelonke msinya kangangoko kunokwenzeka emva kokuba uwisiwe.
- (5) Akukho Mthetho wePalamente ogunyaza ukubhengezwa kwemeko yequbuliso, kwaye akukho mthetho wepalamente owisiweyo okanye elinye inyathelo elithatyathwe ngenxa yesibhengezo, onokuthi uvumele okanye ugunyaze-
 - (a) ukukhululwa kukarhulumente okanye nawuphi na omnye umntu ekuphenduleni ngeziphumo zesenzo esingekho mthethweni;
 - (b) ukuphambuka kokutshiwo sesi siqendu; okanye
 - (c) ukuphambuka kwisiqendu esikhankanywe kumhlathi wesiCangca samaLungelo Angenakunyhashwa, ngokwenqanaba eliboniswe kweso siqendu kumhlathi 3 wesiCangca.

IsiCangca samaLungelo Angenakunyhashwa

1 Isiqendu	2 Umxholo kweso siqendu	3 Ubungakanani bokukhuseleka kwelungelo
9	Ukulingana	Ngokumayela nocalulo olungenabulungisa, kuphela xa lulolobuhlanga, lulolwebala, lulolobuzwe okanye lulolwemvelaphi ngokwasentlalweni, lulolwesondo, lulolongulo okanye ololwimi.
10	Isidima sokuba ngumntu	Ngokupheleleyo
11	Ubomi	Ngokupheleleyo
12	Inkululeko nokukhuseleka komntu	Ngokumayela nesiqendwana (1)(d) no-(e) no-2(c).
13	Ubukhoboka nomsebenzi wesinyanzelo	Ngokumayela nobukhoboka
28	Abantwana	Ngokumayela: - nesiqendwana (1)(d) no-(e); - namalungelo akwisiqendwana (i) nesesi-(ii) kwisiqendwana (1)(g); kunye - nesiqendwana (1)(i) ngokumayela nabantwana abaminyaka ili-15 nangaphantsi.

1 Isiqendu	2 Umxholo kweso siqendu	3 Ubungakanani bokukhuseleka kwelungelo
35	Abantu ababanjiweyo, abavalelweyo nabamangalelweyo	Ngokumayela: - nesiqendwana (1)(a), (b) no-(c) no-(2)(d); - namalungelo akwisiqendu (a) ukuya ku-(o) kwisiqendwana (3), ngaphandle kwesiqendu (d); - nesiqendwana (4); - nesiqendwana (5) ngokumayela nokungamkelwa kobungqina ukuba ukwamkelwa kwabo kuya kukwenza ukuxoxwa kwetyala kube kokungenabulungisa.

- (6) Nanini na xa umntu evalelwe akwaxoxwa tyala ngenxa yokunyhashwa kwamalungelo okuzalwa kukubhengezwa kwemeko yongxamiseko, makunikelw' ingqalelo kwimiqathango elandelayo:
 - (a) makuqhagamshelwane msinya kangangoko kunokwenzeka nelungu losapho elingumntu omdala okanye umhlobo womntu ovalelweyo, aziswe into yokuba umntu ovalelweyo uvalelwe;
 - (b) makupapashwe isaziso kuShicilelo-Mithetho LukaRhulumente lwezwelonke zingaphelanga iintsuku ezintlanu evalelwe umntu lowo, kuxelwe igama lomntu ovalelweyo nendawo avalelwe kuyo, kuxelwe nenyathelo lemeko yequbuliso avalelwe ngenxa yalo loo mntu;
 - (c) umntu ovalelweyo makavunyelwe ukuba azikhethele ugqirha aze atyelelwe nguye nangaliphi na ixesha elifanelekileyo;

- (d) umntu ovalelweyo makavunyelwe ukuba azikhethele igqwetha, aze atyelelwe lilo nangaliphi na ixesha elifanelekileyo;
- (e) inkundla mayikuqwalasele ngokutsha ukuvalelwa kwakhe msinya kangangoko kunokwenzeka, kodwa kungadanga kuphele iintsuku ezili-10 emva komhla awavalelwa ngawo umntu, kwaye inkundla mayimkhulule umntu ovalelweyo ngaphandle kokuba kuyimfuneko ukumgcina evalelwe ukuze kubuye kubekho uxolo nocwangco;
- (f) umntu ovalelweyo ongakhululwanga xa kuqwalaselwa ngokutsha ukuvalelwa kwakhe ngokwesiqendu (e), okanye ongakhululwanga xa kuqwalaselwa ngokutsha ukuvalelwa kwakhe ngokwesi siqendu, unokwenza isicelo enkundleni sokunye kwakhona ukuqwalaselwa ngokutsha kokuvalelwa kwakhe nangaliphi na ixesha emva kokuba ziphelile iintsuku ezili-10 ukususela ekuqwalaselweni ngokutsha kwangaphambili, kwaye inkundla mayimkhulule umntu lowo uvalelweyo ngaphandle kokuba kuseyimfuneko ukumgcina evalelwe ukuze kubuye kubekho uxolo nocwangco;
- (g) umntu ovalelweyo makavunyelwe ukuba avele buqu phambikwayonayiphinainkundlaeqwalaselaukuvalelwa kwakhe, amelwe ligqwetha koko kuqwalaselwa, kwaye atsho afuna ukukutsho ngokuqhubeka kwakhe evalelwe:
- (h) urhulumente makanike inkundla izizathu ezibhaliweyo ezikwenza kuthetheleleke ukuqhubeka kwakhe evalelwe, kwaye makanike umntu ovalelweyo ikopi yezo zizathu ubuncinane kusasele iintsuku ezimbini ngaphambi kokuba inkundla ikuqwalasele ngokutsha ukuvalelwa kwakhe.
- (7) Ukuba inkundla iyamkhulula umntu ovalelweyo, loo mntu akanakuvalelwa kwakhona ngezizathu ezifanayo ngaphandle

- kokuba urhulumente uqale abonise inkundla isizathu esivakalayo sokumvalela ngokutsha.
- (8) Isiqendwana (6) nese-(7) azisebenzi kubantu abangengabo abaseMzantsi-Afrika nabavalelwe ngenxa yongquzulwano lwamazwe ngamazwe kuxhotyiwe. Ndaweni yoko, urhulumente makenze okufunwa yimigaqo enkqamangela iRiphablikhi phantsi komthetho wamazwe ngamazwe wokuboniswa kobuntu ngokumayela nokuvalelwa kwabo bantu.

Ukunyanzeliswa kwamalungelo

- 38. Nabani na odweliswe kwesi siqendu unelungelo lokuya kwinkundla enegunya elifanelekileyo, esithi ilungelo elikuMqulu wamaLungelo linyhashiwe okanye lisemngciphekweni wokunyhashwa, inokuthi ke inkundla yenze uncedo olufunekayo, oluquka ukuvakaliswa kwamalungelo. Abantu abanokuthi baye enkundleni ngaba—
 - (a) nabani na omele isigu sakhe;
 - (b) nabani na omele omnye umntu ongakwaziyo yena ukuzimela:
 - (c) nabani na olilungu leqela elithile labantu okanye omela elo qela ukuba alincede;
 - (d) nabani na ofuna ukunceda uluntu;
 - (e) nombutho ofuna ukunceda amalungu awo.

Ukuchazwa kwentsingiselo yoMqulu wamaLungelo

- 39. (1) Xa ichaza intsingiselo yoMqulu wamaLungelo, inkundla, abachopheli-matyala okanye abachopheli-mcimbi-
 - (a) mayikhuthaze izithethe ezisisiseko zoluntu olukhululekileyo lwentando yesininzi oluxabise isidima sokuba ngumntu, ukulingana nenkululeko;
 - (b) mayiqwalasele umthetho wamazwe ngamazwe; kananjalo
 - (c) isenokuthi iqwalasele umthetho welinye ilizwe.

ISAHLUKO 2: UMQULU WAMALUNGELO

- (2) Xa zichaza intsingiselo yawo nawuphi na umthetho wepalamente, naxa ziphucula umthetho ongabhalwanga phantsi okanye umthetho wakwantu, zonke iinkundla, abachopheli-matyala okanye abachopheli-mcimbi mabakhuthaze umoya nenjongo yoMqulu wamaLungelo.
- (3) UMqulu wamaLungelo awubukhanyeli ubukho bamanye amalungelo okanye iinkululeko ezivunywayo ngumthetho ongabhalwanga phantsi okanye ezifumaneka kuwo, nakumthetho wakwantu okanye kumthetho wepalamente, kuphela nje xa evisisana noMqulu wamaLungelo.

AMAZIKO EKUNOKUYIWA KUWO MAYELA NAMALUNGELO AKHO

1. IOfisi yoMkhuseli woLuntu

IOfisi yoMkhuseli woLuntu inenjongo yokufezekisa umsebenzi ewunikwe nguMgaqo-siseko wokomeleza intando yesininzi yoMgaqo-siseko ngokuphanda izenzo ekuthiwa zigwenxa ezenziwa ngamacandelo karhulumente, ngokwenza lula ukusonjululwa kweembambano, ngokwenza ingxelo nangokwenza izindululo ngenyathelo emalithatyathwe lokulungis' imeko, nangokwenza abantu bazi ngenxaxheba efezwa nguMkhuseli woLuntu nemisebenzi ayenzayo.

Iinkcukacha zonxibelelwano

Idilesi yesitrato: 175 Lunnon Street

Hillcrest Office Park

Pretoria 0083

Idilesi yeposi: Private Bag X677

Pretoria 0001

Inombolo yomnxeba: 012 366 7000 eyasimahla: 0800 11 20 40

Ifeksi: 012 362 3473 / 086 575 3292 Idilesi yeimeyili: customerservice@pprotect.org

registration2@pprotect.org.za

Iwebsayithi: www.pprotect.org

2. IKomishoni yamaLungelo oLuntu yaseMzantsi-Afrika

IKomishoni yamaLungelo oLuntu yaseMzantsi-Afrika liqumrhu elithe saa kwilizwe liphela elasekelwa ukumilisela intando yesininzi yoMgaqo-siseko ngokukhuthaza amalungelo oluntu nangokuwakhusela ngokulungisa ukunyhashwa kwawo nangokufuna iindlela eziphumelelayo zokulungisa oko kunyhashwa, elasekelwa ukubek' esweni ukuhlonelwa kwamalungelo oluntu, elasekelwa ukwenza abantu bazi ngemibandela emayela namalungelo oluntu, elasekelwa nokufundisa ngamalungelo oluntu.

Iinkcukacha zoqhagamshelwano

Idilesi yesitrato: Braampark Forum 3,

33 Hoofd Street Braamfontein Johannesburg

Idilesi yeposi: Private Bag X2700

Houghton Johannesburg

2041

Inombolo yomnxeba: 011 877 3600 Ifeksi: 011 403 6621

Idilesi yeimeyili: info@sahrc.org.za

complaints@sahrc.org.za

Iwebsayithi: www.sahrc.org.za

3. IKomishoni Yokukhuthazwa Nokukhuselwa Kwamalungelo Abantu Abaphila Ngokwenkcubeko Yabo, Ngokonqulo Lwabo Nangokolwimi Lwabo

IKomishoni Yokukhuthazwa Nokukhuselwa Kwamalungelo Abantu Abaphila Ngokwenkcubeko Yabo, Ngokonqulo Lwabo Nangokolwimi Lwabo inenjongo yokukhuthaza uxolo, ubuhlobo, ubuntu, unyamezelwano nobunye elizweni phakathi kwabantu abaphila ngokwenkcubeko yabo, ngokonqulo lwabo nangokolwimi lwabo.

Iinkcukacha zoqhagamshelwano

Idilesi yesitrato: Braampark Forum 4,

33 Hoofd Street Braamfontein Johannesburg

Idilesi yeposi: Private Bag X 90 000

Houghton

2041

Inombolo yomnxeba: 011 537 7631

Ifeksi: 011 880 3495 / 086 660 8986

Idilesi yeimeyili: chairperson@crlcommission.org.za

ceo@crlcommission.org.za info@crlcommission.org.za

complaints@crlcommission.org.za

Iwebsayithi: www.crlcommission.org.za

4. IKomishoni Yokulingana Ngokwesini

IKomishoniYokulinganaNgokwesiniyasekwangenjongoyokukhuthaza ukulingana ngokwesini nokuhlonelwa kwako, nokuqinisekisa ubukho bokulingana ngokwesini kuwo onke amacandelo oluntu. Ngenxa yoko iKomishoni Yokulingana Ngokwesini izama ukuba kungabikho kucalulwa ngokwesini nazo zonke iintlobo zengcinezelo, ukuze abantu babe nethuba neendlela zokufikelela kwinqanaba abanokufikelela kulo, kungakhathaliseki ukuba baloluphi uhlanga, udidi, isini, unqulo, bathandana nabantu basiphi isini, bagogekile, okanye kungakhathaliseki ukuba bahlala kowuphi ummandla.

Iinkcukacha zoqhagamshelwano

Idilesi yesitrato: Constitution Hill

Women's Jail East Wing

2 Kotze Street Braamfontein Johannesburg

Idilesi yeposi: P.O Box 32175

Braamfontein

2017

Inombolo yomnxeba: 011 403 7182 Ifeksi: 011 403 7188

Idilesi yeimeyili: cgeinfo@cge.org.za Iwebsayithi: www.cge.org.za

5. IOfisi yeKomishoni yaBasebenzi bakaRhulumente

IOfisi yeNkonzo yaBasebenzi bakaRhulumente ilifumana igunya layo kwisiqendu 195 nese-196 soMgaqo-siseko. Phakathi kwezinye izinto iKomishoni yaBasebenzi bakaRhulumente inikwe umsebenzi negunya lokuphanda, nokubek' esweni, nokuphonononga ukulungelelaniswa nokulawulwa kwaBasebenzi bakaRhulmente.

Eli gunya likwaquka ukuphononongwa kwezinto ezifeziweyo okanye ukungabikho kwezinto ezifeziweyo kwizicwangciso zikarhulumente. IKomishoni yaBasebenzi bakaRhulumente ikwanyanzelekile ukuba ikhuthaze amanyathelo okuqinisekisa ukuba imigaqo yokulawulwa kukarhulumente njengoko ixelwe kuMgaqo-siseko, iyasebenza kubo bonke aBasebenzi bakaRhulumente.

Iinkcukacha zoqhagamshelwano

Idilesi yesitrato: Commission House

Cnr Hamilton & Ziervogel Streets

Pretoria

Idilesi yeposi: Private Bag X121

Pretoria 0083

Inombolo yomnxeba: 012 352 1000

Ifeksi: 012 325 8382

Idilesi yeimeyili: info@opsc.gov.za iwebsayithi: www.psc.gov.za

6. ISebe loBulungisa Nokuphuhliswa KoMgaqo-siseko

ISebe loBulungisa Nokuphuhliswa KoMgaqo-siseko lineSebe ekuthiwa Lelokuphuhliswa KoMgaqo-siseko. Injongo yeli Sebe kukukhuthaza nokwenza utshintsho nokuphuhlisa uMgaqo-siseko, namalungelo oluntu, nokuthabath' inxaxheba egameni likarhulumente.

Iinkcukacha zoqhagamshelwano

Idilesi yesitrato: 329 Pretorius Street

(c/o Pretorius & Sisulu Streets) First Floor, Momentum Building

Pretoria

Idilesi yeposi: Private Bag X81

Pretoria 0001

Inombolo yomnxeba: 012 315 1111

Idilesi yeimeyili: constitutionalrights@justice.gov.za

Iwebsayithi: www.justice.gov.za

7. ILegal Aid South Africa

ILegal Aid South Africa liqumrhu elizimeleyo elasekwa ngumthetho wepalamente ngenjongo yokunika abantu abangamahlwempu uncedo lomthetho ngokwemali elinayo. Likwanika uncedo lokumelwa ligqwetha ngeendleko zikarhulumente njengoko kuxelwe kuMgaqosiseko nakwimithetho yepalamente ephumeza ilungelo lokumelwa ligqwetha ngeendleko zikarhulumente.

Iinkcukacha zoqhagamshelwano

Ukuze ufumane eyona ofisi yengingqi ekufuphi kuwe yeLegal Aid South Africa, yeziko lobulungisa okanye iofisi elisebe elincinane, qhagamshelana neLegal Aid South Africa ngale ndlela ilandelayo:

Idilesi yesitrato: 29 De Beer Street

Braamfontein Johannesburg

2017

Idilesi yeposi: Private Bag X76

Braamfontein

2017

Inombolo yomnxeba: 011 877 2000 Eyasimahla: 0800 110 110 Ifeksi: 011 877 2222

Idilesi yeimeyili: Communications2@legal-aid.co.za

Iwebsayithi: www.legal-aid.co.za

NOTES

Department of Justice and Constitutional Development
Tel: 012 315 1111
Private Bag X81, Pretoria, 0001
constitutionalrights@justice.gov.za
www.justice.gov.za